



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIAL**

*18 Abril 2016*

*Komunikadu Imprensa*

*Parlamentu Nasional*

**JSMP apresia ho sensibilidade deputadu Komisaun A PN ba asuntu jéneru durante debate Proposta ba Lei Suku nian**

Iha Kinta-feira, 14 Abril 2016, Komisaun A Parlamentu Nasionál kontinua halao diskusaun no votasaun iha especialidade ba Proposta Lei N° 32/III (3ª) kona-ba Lei Suku nian hosi Kapítulu IV husi Seksaun II to'o Seksaun IV kona-ba eleisaun ba xéfi aldeia, lia nain no representante joventude feto no mane.

Iha diskusaun ne'e, deputadu sira iha Komisaun A, aprova mós proposta alterasaun ba artigu 44 kona-ba mekanismu apresentasaun kandidatura ba xéfe aldeia nian ne'ebé tenki involve kandidatu feto. Proposta ne'e hetan reasaun makas hosi deputadu sira no kestiona katak proposta ne'e bele impede prosesu eleisaun aldeia iha futuro. Deputadu sira ne'ebé argumenta katak artigu ne'e bele impede prosesu elisaun tanbá kandidatu feto sira sei mínimu tebes. Ida-ne'e kontrariu ho kultura bandu ne'ebé eziste tinan barak iha suku balun.

Hatan ba kestaun ne'e deputada Carmelita C Moniz ho deputadu Aniceto Guterres ne'ebé sai hanesan proponentes ba proposta ne'e reafirma katak objetivu hosi proposta lei ne'e atu enkoraza feto sira nia partisipasaun iha baze. Proposta ne'e mós nu'udar resposta ezijensia hosi rekomendasaun Komité CEDAW nian (The Convention on the Elimination of all Forms of Discrimination Against Women (CEDAW) ne'ebé Timor Leste ratifika ona.

Aleinde ne'e, iha artigu 44 (3) proposta lei ne'e fó espasu eksepsaun ba situasaun balun ne'ebé karik la iha ona kandidatura feto iha aldeia, meja assembleia eleitoral aldeia tenki rona deklarasaun organizasaun feto sira no halo deklarasaun tuir faktus hodi determina realizasaun ba prosesu eleitoral.

Antes ne'e, Komité CEDAW liuhosi Komité ninia Konkluzau finál kona-ba relatóriu periódiku daruak no datoluk hosi Timor-Leste ba Jenebrá, iha 20 Novembru 2015, rekomenda katak, Estadu Timor-Lest nu'udar estadu parte, tenke:

(a) Adopta medidas sira, inklui medidas temporariu espesial, no fornese servisu sira atu promove representasaun feto nian igual iha politika no vida públiku iha nivel hot-hotu, espesialmente iha pozisaun ba halo-desizaun, inklui medidas espésifiku atu elimina estereótipo no diskriminasaun kontra feto ninia partisipasaun iha vida pólitika no públiku;

(b) Adopta medidas sira, inklui medidas espesial atu hasae persentajen fetu xefia iha nivel suku liuhosi lei elisaun suku foun ne'ebé sei atu diskute hosi Parlamentu Nasionál iha tinan 2016 no dezemvolve treinamentu orientadu no programa monitorizasaun kona-ba kampaña, lideransa no kapasidade negosiasaun ba lideransa aktual no kandidatu potensial fetu no sira ne'ebé okupa hela kargu iha instituisaun públiku sira.

JSMP apresia tebes ho sensibilidade deputadu sira atu promove direitu fetu no enkoraza partisipasaun fetu iha nivel hotu-hotu iha Timor-Leste. Liu-liu atu konsidera rekomendasaun Komité CEDAW iha pratika politika públiku no prosesu lejislativu. JSMP enkoraza liutan deputadu sira hotu nia konsiderasaun ba proposta ne'e hodi aprova iha votasaun final global iha plenaria Parlamentu Nasionál, dehan Diretór Ezekutivu JSMP Luis de Oliveira Sampaio.

Proposta ne'e mós, ikus-mai hetan konkordansia entre deputadu sira iha Komisaun A no Guvernu ne'ebé halo reasaun. Proposta ne'e pasa ho votus afavor 11, kontra 0 no abstensaun 0 hosi total deputadu 11 presente.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

[www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl